

Tutu é kuvi ūun e táxnūu San Pedru

Taxnūu Pedru tú'un iña ña ntákuinti'xe i da mí'i ka ntántoo ña

¹ Xu'u é Pedrú u ne, pustru iña Jesúcristú u. Taxnūu u tú'ūn sa'á iña ña é ña te ntóo ñuú mii ī, ðivi ñā e ntántoo ñuú Pontú, ni ñuú Galaciá, ni ñuú Capadociá, ni ñuú Asiá, ni ñuú Bitinia, ² ña e náxaxnúu Xuva kō nte dí'na vatā o ntó ña. E tsóo xio Espíritū Sántū san nto vata koo é kāda ntaa nto é kāka'an Jesúcristú ne, vata koo é ntūntoo nima ntó niñi ña. Nā tē nté kaa na naxnuu viko Xuva ko ntō, na tā'xi ña é kuntōo vá'a nto utén uten.

É ntantétu ō é vā'a

³ Ká'an ō tsi dóo ka'nu Xuva ko, ðivi Uvā Tó'o ko Jesúcristu, tsi dóo ntúntā'ví ini ña kō né, tā'xi ña é kaku xtuku o ntā'a Jesucristu da ntóto xtuku ña é xi'i ña. Dukuān né, kuntōo díni ō é ntantétu o nūu i é vā'a é nī'i ko te kúvi. ⁴ Tsí ni'i ko uun doméní é ta'xi Xuva ko iña i'xá ña. Nā kantī'i doméní san. Vā'ā kue'én ne, ñá kunāá ntii dañu ntūvi. É tūví vā'á iña nto e dukún kan tē xee nto. ⁵ Tsí da xe ntákuinti'xe nto Xuva kō ne, nīi kue'én ini ña nada'an ña nto vata koo é xēe nto mí'i iō tu've é kuntoo nto ni ñā. Ta'xi ña é kūtuni nto sá'a ntuvi tē ntī'i ñuxiví sa.

⁶ Dukuān né, kuvi kuntōo díni nto, kuān te ntánto'o nto vevii uun da'na dá iō nuu i e dóo ntii tū'un. ⁷ Kāá kuaán san ne, kuān té ña kaxntíi ntii dañu ntūvi, ntá tsi ntaé'mi ña vata koo é ntī'i un ntīi ntīi nuu i é ña vá'a e ntádāka. Kuān ó kakuvi ni ntō da ntánto'o nto ði. Dukuān ó kantī'i nuu i é kīni ntāa é ñū'u nima ntó ne, kutuni te vá'a o ntákuinti'xe nto. Tsi dii díi ka nuu á'vi i é kuínti'xe vá'a nto Xuva kō é vāta kaa kaá kuaán san. Kidāā né, tē kuínti'xe vá'a nto, kuān te ntánto'o nto ne, ká'an Xuva kō tsi dóo va'á nto ne, ni'i nto dokoñu'u ntuvi tē naínu xtúku Jesucristu.

⁸ Dōó ntio nto Jesucristú, kuān té vata kiní nto ña. Kuān té ña kaíni ntó ña vevii ne, ntákuinti'xe nto ña. Dukuān ne, ñá tē nté kaa diní nto. Ntē ña xee tá'an tú'un é ká'an nto nté kaa e diní nto, tsí vata tsi tē ntoo nto e dukún kán vevii. ⁹ Tsí da xe e kuínti'xe nto ne, é nakáku nima nto.

¹⁰ Ntuvi di'na ne, ña é ka'án naa Xuva kó ne, ntáka'an ñá nuu i é vā'á san é nī'i nto vevii. Dōo nántuku ña, dōo tsíxe'e ña kuēnta iña i sá'ā. ¹¹ Xé'e Ēspíritū Cristu é kūtuni ñá nte dí'na nee iña é vē'xi é ntō'lo Cristú, ni nūu i é vā'a é nī'i ñá rkontuvi. Dōo dé kuení ñá xoo ná'a ntu é vii ña sá'ā ne, amá ntu kuvi di. ¹² Ntá tsi xe'é Xuva kō é kūtuni ña tsi tú'un e ntáka'an ñá ne, ñá tē é vā'á mii ñá, tsi é vā'á mii ntō. Tsí divi tū'un e ntáka'an ñá ni ntō vevii, ña e ntáka'an ntódo tú'un é nakáku ō. Kaxé'e Ēspíritū Sántū, ña e táxnuu Xuva kō nte e dukún kán, é kuān o ntáka'an ñá ne, ñá tē nté kaa ntio ánjē sán kutuni ñá nuu i sá'ā.

Kana Xuva ko kō é vā'á kue'en na kuvi o

¹³ Dukuān ne, koo tú've nto. Kuntitō xnto. Ntánī nima ntó kuntētu nto nuu i é vā'á san é nī'i nto te naínu xtúku Jesucristu. ¹⁴ Vatā ó de i'xa é kāde ntaa ne, ñá vii ka nto é ntio nima káni kaa nto, vata ō dé nto kídaā dá vata kutú've nto iña Xuva ko. ¹⁵ Ntá tsi é un nti'f é vii ntó ne, víi nto é vā'á kue'en, vatā ó de Xuva kō, ña e kána nto. ¹⁶ Tsí kaka'an tú'un Xuva kō: “É vā'á kue'en kuvi nto, vata tsi ō va'á mií u”, ka'an ña.

¹⁷ Xuva kō ne, kaito nteé ña kō é un é un o te vā'á o, tē ña vá'a o kade ō; ñá kāde ña kuenta xoo ñá'a ō. Tē ntáka'an nto Úva nto ñá ne, kuntoo koñu'u nto dá kanií ntūvi e tá'xi ña é kuntōo nto ñuxiví sa. ¹⁸ Ini nto tsí da nakáku ña kō é dōto tsi ntáde o nuu i é ña kaidiá'vi vatā xkoó ini uváta kō, ña intóo kídaā ne, ñá tē diu'un ni ntá'vi ña kuenta iña kó, ntē ña té diu'un kui'xín, ntē ña te káa kuaan, nté da nēé ka nuu i é kanatívi. ¹⁹ Tsí niñí Cristu e dōo nuu á'vi i e ntá'vi ña iña ko. Cristú ne, vata kaa a le'ntu é ña tuví nee kuetsí i, é ña ni kuléntū, kaa ña. ²⁰ Nté dí'na dá iñi ntu'u ñuxiví san ne, dē kú've Xuva kō é kuān koo kuvi ña. Ntá tsi dá nté ntuvi sá'a dá dokó sa nti'i ñuxiví sa ne, taxnuu Xuva ko ñá

é vā'á tsi mii ntō. ²¹ Tsí kuenta iña ñá ne, ntákuinti'xe nto Xuva kō. Tsí Xuva kō ne, nantóto ña ña dá xi'i ñá ne, xé'e ñā e dóo ka'nu ña'a kúvi ña, vata koo é kuinti'xe nto Xuva kō, vata koo é kūtuni nto tsí nta'a ña vé'xi é un nti'í é vā'á iña nto.

²² É ntūntoo nima ntó e kuínti'xe nto é nuu é ntaā i. Vevíi ne, ñī kue'én ini nto na kuīnima ntó ta'an nto, ña ntákuinti'xe i san. Dukuān né, koo ntii ntō é kuīnima ntí'xe nto ta'an nto kanī nima nto. ²³ Tsi e ní'i nto ntuví xéé iña nto é vata kaa te ūvi íto káku nto. Ntá tsi ña te kuenta iña uva nto ña é xi'i e káku nto ve, tsí ñi tū'ún Xuva kō é kántíto ntii dañu ntūvi. ²⁴ Tsí uve na'a kaka'an tū'un Xuva kō:

Un ntií ntií ña'a sán ne, vata ntáa xuku ntáa ña.
E dóo nuu á'vi i iña ña vevíi ne, vata ntáa laa xuku ntáa.
Kaxi'i díi xuku i sán ne, kanakó'xo laa i,
²⁵ ntá tsi tū'un Xuva kō ne, kutūví ntii dañu ntūvi,
ka'an. Tū'ún tsikán ne, ñi tū'un é vā'a e ntáka'an ntódo ña ni ntō.

2

¹ Dukuān ne, ñá víi ka nto nté uun ká nuū i é kīni kaa. Ñá kanī nta'ví ka nto ta'an nto. Ñá te ūvi nuu i víi nto. Ñá ku kune'ū iní ka nto. Ñá ká'án ka nto é kīni kaa iña ta'an nto. ² I'xa é dā ve káku ne, dóo kanantukū é tsitsi. Kuan koo nantūku nto tū'un Xuva kō dí, ñi tū'un é vā'á kue'en. Kuān koo kue'nu nto da nté nāni'i kué'en nto ntuví va'á iña nto. ³ Tsi é iní ntó ve e dóo va'á Xuva kō.

Cristú ne, vata kaa xuu é kántíto kaa ña

⁴ Ki'xi etsin nto Cristu vé, ñi ñā é vata kaa xuu é kántíto kaa ña. É nakuítá ña'a san xuú san, ntá tsi Xuva kō né, ñi xū é nakaxnúu ña, e ña te nté kaa nuu á'vi i kuenta iña ña. ⁵ ñi ntō né, vata ntáa xuu é kántíto ntáa nto ñi. Kué'e ntō é víi Xuva ko ni ntō vata koo é kūvi nima ntó vi'i ña. Ta'xi ña é víi ntó dutu ñá ñi, vata koo é kue'én ntō ña doméni ntuví iña nto vata o ntó ña. Ki'i ña doméni nto, tsí ntuvá'a nto ni ña kuēnta iña Jesús cristu. ⁶ Tsí uve na'a kaka'an tū'un Xuva kō:

Uun kaa xuu e xtúvi ú ñuú Siuún ne,
uun xuu é nakaxnúu u é kodo nūu,
uun xuu e dóo nuu á'vi i.

Xoo é kākuinti'xe i ne,
ñá kuntā'xa iní ña kuenta iña i,
ka'an. ⁷ Dukuān né, ntō'o e ntākuinti'xe ntó ña ne, ñá tē
nté kaa va'á ña, kuiní nto. Ntá tsi ña'a, ña é ña ntākuinti'xe
i ña ne, nto'o ña vatā ó uve na'a kaka'an tú'un Xuva kō:

Xúū é nākuíta ña ntáde vá'a vi'i san ne,
divī kúvi xuu ódo nūu éti vi'i san,
ka'an. ⁸ Kaka'an xtúku tú'un Xuva kō:

Naki'í ña'a san xuú san ne,
ntava ntodó ña,

ka'an. Tsí ntava ntodó ña tē ña kuintí'xe ña tú'un Xuva
kō. Tsí kuan ō de kú'vē ña é kōo.

⁹ Ntá tsi divi ntō ne, ña'a é nakaxnúu Xuva ko kúvi nto.
Dutu iñá rei kúvi nto ne, uun tatá ña'a é ntūntoo nima i
kúvi nto, tsi ntáduku ntée nto Xuva kō. Kuān ó ni ntō vata
koo é kā'an nto tsi dóo vá'ā o dé Xuva kō tsi e nátavā ñá nto
mí'í e dóo neé san ne, da tsóo ña nto mí'í e dóo vá'a kaxi'í
nuu mí tuví ña. ¹⁰ Di'na ne, ñá tē nee ñá'a nto, ntá tsi veví
ne, ña'a Xuva ko ntō. Di'na ne, xoxó ña'a é kantunta'ví ini
ña nto, ntá tsi veví ne, kantunta'ví ini Xuva ko ntō.

Kada tsiñu nto iña Xuva ko

¹¹ Ení ko e dóo ntio kó nto, vata ntáa ña tuku ñuu ntáa
nto, é vata te vē'xí taan xnto ñuxiví sa. Dukuān ne, kaikán
u nto tē ña víi nto é kīni kaa é ntio kúñu ntō é kanāa ntée
nima nto. ¹² Vá'ā koo víi nto dá ntoo nto mé'ñū ña'a, ña
e ñá ini Xúva kō. Dukuān né, kuān te ntáka'an kīni ña iña
nto vevii tsí ña te vá'ā ó de nto ne, ntá tsi kīnī ña tsi ntáde
nti'xe nto é vā'a. Kidáa né, te vē'xí Xuva kō é vēxkada
kú'vē ñá ne, ká'an ña tsi dóo ka'nu Xuva kō.

¹³ Kuenta iña Tó'o ko Jesūcristú ne, kuiko ñu'u nto ūn
ntíí ntíí ña uve da neé ka tsiñu, kuān té ña tsiñu na'nu i, tsí
divi ña é odo nūu ña, ¹⁴ o kuān té ña tsiñu i san é kataxnūu
ña. Tsí divi tsiñu ña é kué'é ña na ntō'o ña ntáde é kīni
kaa sán ne, ō é kā'an ña e dóo vá'ā ó de ña ntáde ntaá san.

¹⁵ Ntio Xuva kō é kuān koo vií nto vata koo é ña kuvi ka'an ntée ña tuntú san nto, ña é dotō tsi ntáka'an.

¹⁶ Kuān té xoxó ka taxnuu i nto nté koo vií nto, ntá tsi ña ku dotō tsí vií nto é kīni kaa, tsí vii nto é vā'á vata tsí ó de ña ntáde tsiñu iña Xuva ko. ¹⁷ Kuiko ñu'u nto ūn ntíí ntíí ña'a san. Kuinima nto un ntíí ntíí ta'an nto, ña ntákuinti'xe i san. Kuiko ñu'u kuē'en ntó Xuva kō. Kuiko ñu'u ntō ñá odo nūú san.

Koto nto nté o ntó'o Cristu

¹⁸ Nto'o e ntáde tsiñu nto ne, kada ntaa nto e ntáka'an tó'o ntō. Kuān te vā'a ña'a ña ne, ntántunta'ví ini ña nto, kuān te dóo diin ñá ne, ntá tsi kuiko ñu'u nto ña. ¹⁹ Tsí kaka'an Xúva kō tsi vā'á ó te kutíi o é nto'o ko kuēnta iña nuu i é ña te kuétsi ko, tē ntáde ntaa o e ntío ña. ²⁰ Te nī'i nto é nto'o nto te vii nto é kīni kaa ne, ¿va dóo ntu nuu á'vi nto e kūtíi nto é ntō'o nto iña kuétsi nto san? Ntá tsi te kūtíi nto nto'o nto kuenta iña nuu i é vā'a é edé nto ne, tsí kán é nuu á'vi i, kuiní Xuva kō. ²¹ Dīvi tsi tsiñu kána Xuva ko ntō é vii nto. Ini nto nté o ntó'o Cristu kuenta iña nto. Dukuān ne, nánē'e ñá nto nté koo vií nto vatā o dé ña. Kuān tsi koo vií nto di. ²² Dīvi ñā ne, nté uun ito ña ni ide ña é kīni kaa; nté uun ito ña ni eni ntá'ví ña ña'a. ²³ Dā ka'an kīni ña'a san ni ñá ne, ñá ni nantiko koō ña nté uun é kīni kaa. Dā ntó'o ña ne, ñá ni ká'an ñá te ntanáa ña. Ntá tsi ntáda ña kuenta ntá'a Xuva kō, ña e dóo ini é xntēkú kū'vé va'a. ²⁴ Mii ñā ído ña kuétsi kō kúñu ñā dá xi'i ña ntíkā krusi kan vata koo é ña vií ka o é kīni kaa, tsí vii o da mīi é vā'a. Dīvi ñā ni'i kui'y ña vata koo é ntuvá'a nto. ²⁵ Tsí di'na ne, ntaíka xaa nto vata ntáa le'ntu, ntá tsi e ntíko koō nto mí tuví paxtu ntó, ña kanada'an nima nto.

3

Nté koo vií ña e éni vi'i

¹ Dukuān dí, ñadī'y, kuiko ñu'u ntō xii nto, vata koo te iō ña é ña ntákuinti'xe i tú'un Xuva kō ne, nakaku ña, kuān te nté uun tú'ūn ña ni ka'an ntó ni ñā, tsi dóo vā'á o ntáde nto utén uten. ² Tsí ini ña tsi dóo vā'á ó de ñadi'ñá, tsi dóo koñu'u ña. ³ Ña te e ntántukutu ntō né, ntē ña te dóo

vá'ā o ntánekk̄n nto díki nto, ntē ña te kiti e kúvi kaá kuaan kañú'u nto, ntē ña te dú'nu e dóo va'á kue'en. ⁴ Tsi é nuu xū'ú nima ntó k̄n, e dóo vita ini nto, e dóo ñikādín nima nto. Tsík̄n e díi ka nuu á'vi i nuu Xuva ko, tsí dívi é ña te kánatívi kue'en. ⁵ Tsí kuan ō dé ñadi'i va'á san kídaa dí, ña ntákuinti'xe i Xuva kō. Edé ntaa ña e ntáka'an xii ña, ⁶ vata ō dé ntaa Sárā san é k̄aka'an Ábraan. Kaka'an ñá tsi tó'o ña ñā. Dívi ntō ne, i'xá ña nto te vii nto é vā'á ne, nté uun nuu i ña te ntaú'vi nto.

⁷ Dívi ntō dí, ñatīi, kuenta vii nto ñadi'i nto, tsí ña túvi ntīi ña vatā ó iō ntīi nto. Kuiko ñu'u nto ñā, tsí dadīi tsi ni'i nto ntuví va'á iña nto ni ña nta'a Xúva kō. Kuān koo vii nto vata koo é ña te neé kadī nuu i tē ntáka'an ntá'vi nto.

Ña e ntánto'o i e ntáde é vā'a

⁸ Uun ká xtuku nuu i ká'ān ú ni ntō. Kuédadii tsi nima ntó, un ntīi ntīi nto. Na k̄xnúu nto ta'an nto nee iña e ntánto'o ña. Na ntuntā'ví ini nto ta'an nto. Kuinima ntó ña. Ná vii ka'nu nto ni ñā. ⁹ Tē ntáde ña'a san é kīni kaa ni ntō ne, ña nantíko kōo nto é kīni kaa sán dí. Tē ka'an kīni ña'a san ni ntó ne, ñá ku k̄'an kīni nto ni ñā, tsi vá'a koo ka'an ntó ni ñā. Tsi kána Xuva ko kō vata koo é ta'xi ña kō é vā'a. ¹⁰ Tsí uve na'a kaká'an tú'un Xuva kō:

Tsí xoo ñá'a é ntio ña e dóo vá'a koo kuita ntí'xin ntuvi iña ñá ne,

kuenta na víi ña é ña ká'an ña é kīni kaa,
é ña kaní nta'ví ña ta'an ña.

¹¹ Na xtuvī mii ña é vii ña é kīni kaa ne,
na vii ña é vā'a.

Na nantukū ña nté koo kuntoo vá'a ña ni tā'an ña.

¹² Tsí kainí Xuva ko xōo é vā'á ña'a ne,
katekú ña te k̄aka'an ntá'ví ña ni ñā,
ntá tsi ña ncho kīni ña xoo é kīni ntāa i,
ka'an tú'un Xuva kō.

¹³ ¿Xoo ntu kuvi vii i ni ntō é kīni kaa te dí mii tsi nuu i é vā'a ntáde nto? ¹⁴ Ntá tsi tē ntó'o nto kuān te ntáde nto é vā'á ne, kuntōo díni nto. Ná ku dā vá'a nto tē xoo ña'a nau'vi ña nto. Ntē ña kutsú'un nto kuenta iña ña. ¹⁵ Tsí

kini vá'a ntó nima nto tsí Cristú ne, díí ka ka'nu ña. Dìvi ñā e Tó'lo kō. Koo tú've nto nté koo ka'an ntó ni da xōo ka ñā'a te tsíxe'e ña ntō nté kui kuínti'xé nto. Ntá tsi ña víí ka'nu nto. Kuiko ñu'u nto ñā. ¹⁶ Vá'ā koo víí nto vata koo é díni kunuū nima nto. Kidāā né, tē ka'an kīni ñā'a san ñā nto da ntáde nto é vā'a e ntákuinti'xe nto Cristú ne, divi ñā ne, kuka'an nuu ñā.

¹⁷ Tsí díí ka vá'ā ó te nto'o kō da ntáde ō é vā'á san naa i é nto'o kō da ntáde ō é kīni kaa sán, te kuan kōo é ntio Xuva kō. ¹⁸ Tsí mii tsí Cristu ntó'lo ña dá xi'i ña é uun ito tsi kuenta ñā kuétsi kō. Dìvi ñā é ña tuvi kuétsi ñā ne, xí'i ñā kuēnta ñā ko xo'o é iō kuétsí kō, vata koo é kī'in ni'i ñā ko nuu Xuva ko. Xí'i kúñu ñā, ntá tsi nima ñā ne, ntóto xtuku. ¹⁹ Dukuān o ñé'e ñā, ixka'an ntódo ñā mí'i ñu'u kutū nima ñā é xi'í san. ²⁰ Ñā tsíkán ne, ñā intóo kídaā é ña ni kuínti'xe i, kuān te kutii Xuva kō intétu ñā ña ñi dukuān de vá'a Noeé san tun ntóo ka'nu san. Úna ñā'a kudii nakáku ñā é ñu'u vá'a ña iní tun ntóo san dá nakuntéku teni nú ntute kán. ²¹ Kuan kōo vevíí ne, ntántada náa o ñā ñā é nakaku mé'ñu ntute san, tsí nakáku o te ítsi ntute ō. Ná tē tsi kúñu dentu kō é ntuntoo, tsí nima ko é ntūvá'a ni Xuva kō kuenta ñā Jesúcristu, dívi ñā e ntóto xtuku ñā dá xi'i ñā. ²² Kúntāa ñā e dukún kan vē ne, tuví ñā diñi kua'a Xuva kō. Doo ntaíko ñu'ū ánjē san ñā, ni ūn ntíí ntíí ñā odo núu san.

4

Kada tsiñu o vatā o tá'xi Xuva kō é kūvi vii o

¹ Tsi dúkuān né, vata ō ntó'lo Cristu ni kúñu ñā ne, kuan koo kadā kuení nto tsí kuvi víí nto é ntó'lo nto di. Tsí xoo ñā'a e ntó'lo ña nī kúñu ñā ne, é xtuví mii ñā é vii ñā é kīni kaa, ² vata koo e dá ntōo ká ñā ñuxiví san ne, ñā víí ka ñā é ntio kúñu ñā, tsí víí ñā é ntio Xuva kō. ³ E xée ntuvi é tsoo mii ntō é edé nto vatā o dé ñā'a sán di, ñā é ña ntákuinti'xe i Xuva kō. Tsi é un ntí'í é kīni ntāa ntáde ñā. Ncho kada xení ña ni ñādí'i. Ntáde kí'vi ñā. Da mii kué'en tsi dodîni ntáde ñā. Dōo ntáxi'i ñā. Ntaínúu ini ña tuku xuva ñā e ña ntío kue'en Xúva kō. ⁴ Dā kúdu'va ñā e ná ncho kuve ta'an

ká nto ña e ntáde ña nuu i é kīni ntáa ne, ntáka'an kīni ña iña nto ve. ⁵ Ntá tsi nakué'e ña kuenta ntá'a Xuva kō nté o dé ña. Tsí Xuva ko xntēkú ku've ña iña ña ntantíto nī ña é xi'í san. ⁶ Dukuān ne, ká'an ntōdó ña tú'un va'á san nī ña é xi'í san dī vata koo é kuntíto ña kuenta iña Xuva kō, kuān te ni'i kúñu ñā é ntō'o i.

⁷ Dóko sā ntí'i un ntíí ntíí nuu í ve. Dukuān né, kadā kuení va'a nto. Diin diin tsi kuntōo nto vata koo é kūvi ka'an ntá'ví nto kanī nima nto. ⁸ Uun nuu í e díí ka va'a é vii ntó ne: dōó kuinima ntó ta'an nto utén uten. Tsí te kuinima kó ta'an kō ne, kada ka'nu iní o ni ña, kuān te dóo iō kuetsí ña. ⁹ Ná ku dē vīni nto vi'i nto é kutūví ta'an nto. ¹⁰ Tsí e tá'xi Xuva ko tsiñu é vā'a é vii o é un é un ō. Na vii ó tsiñu é vā'á san é vā'á ta'an ko vatā ó de ña ñu'u nta'a i tsiñu na'nu é xe'é Xuva kō. ¹¹ Xoó ña'a é kākā'an ñá ne, na kā'an ñá vata ō xe'é Xuva kō é kā'an ña. Xoó ña'a é kaxntii ña tā'an ña ne, na kōó ntii ña vii ñá vata ō xe'é Xuva ko ntii ñā é vii ñā, vata koo é da nēé ka é vii ó ne, ká'an ñā'a sán tsi dóo va'á Xuva ko ni i'xā ñá Jesucristu. Ká'an ō tsi dóo va'á ña. Na kadā kú've ka ña é un ntí'i ntii dañu ntūvi. Kuan tsi koo na kōo.

É nto'o kō é kuntikīn ó Cristu

¹² Ení ko e dóo ntio kó nto, ñá ku kadā kuení nto te ñū'u nto mé'ñū ñu'u é kai'xí san é kaīto nteé Xuva ko ntō. ¹³ Ná ku da kudū'va nto, tsi dīnī koo kuntōo nto e ntánto'o nto vata ō ntó'o Cristu, vata koo é díí díí ka dīnī nto ntuvi tē naínu xtúku ña, tē ntii díto ña é kaxi'í nuu ka'nu ña. ¹⁴ Te kā'an ntée ña'a san nto tsi ntákuinti'xe nto Cristu ne, dōó dīnī nto tsi Espíritu Xuva kō e dóo va'a vexkútuvī ñá ni ntō. ¹⁵ Ío ña'a ne, ntánto'o ña e é'ni ña ña'a ne, ō du'u ña ne, o dé ña é kīni kaa ne, ō kini nuu ña iña ña'á san. Nta tsi ña kuān koo vii nto. ¹⁶ Ntá tsi te xoó ña'a ntánto'o ña e ntántikīn ñá Cristú ne, ñá kūka'an nuu ña. Tsí nakué'e ña sintiá'vi nta'a Xuva kō é xe'é ña é kuān koo nto'o ña kuenta iña ña.

¹⁷ E xée ntūvi é xntēkú kū've Xuva kō. Te dī'na xo'o xntekú ku've ñá iña kó ne, ¿nté koo vii ña ni ñā'a san, ña é ña ntákuinti'xe i tú'un Xuva kō? ¹⁸ Tē dá kuetsi ntánakáku

ña é vā'á san ne, ¿nté koo kuvi nī ña ntáde é kīni kaá san, nī ña é iō kuetsí i san? ¹⁹ Dukuān né, ña ñā e ntánto'lo ña tsí kuān o ntío Xuva kō é viī ñá ne, ñá kōo da'na é viī ña é vā'a. Na ntāda ña kuentá nima ñá nta'a Xúva kō, ña é ede vá'a ña, ña e nté uun ito ña tsoo míi ña ñā.

5

Itsi iña ña ntákuinti'xe i

¹ Vi'a ve ne, ncho kué'e ú itsi iña ñáta, ña odo nūú iña nto. Xu'ú ne, ñatā ú ña ne, iní u nté o ntó'lo Cristú ne, dadíi tsi ni'i ko ni ntō é vā'a é tā'xi ña ko te naínu xtúku ña. ² Kuenta vii nto ña e tā'xi Xuva ko nto vatā ó kade paxtú san kuenta a le'ntu ña. Ñá te kuē'e kuetsi ña nto é viī nto, tsi dodíni nto vii nto. Ñá tē é diu'un ntío nto, tsí kaniñ nima ntó vii nto. ³ Ñá ku vii nto tó'lo ña'a, ña e ntáde nto kuenta, tsí nañē'e ntó ña nté koo vii ña vatā o ntáde nto. ⁴ Tē ntii díto paxtu ñá odo nūú san ne, ní'i ntō doméni e dóo va'a é ña kantí'i.

⁵ Dukuān dí, na kuetsi, kuiko ñu'u nto ñata, ña odo nūú san. Un ntíi ntíi ntó ne, ñá vii ka'nu nto ni tā'an nto. Tsí uve na'a tú'un Xuva ko kākā'an:

Ñá kaxntii Xuva ko ñā'a, ña e ntáde na'nu iña mii i, tsí kaxntii ña ña ntā'vi, ña é ña ntáde na'nu san, ka'an. ⁶ Ntā'vi tsí koo vii nto nuu Xuva ko, ña e dóo ntii iní í, vata koo é kada ka'nu ña nto tē xee ntúvi. ⁷ Da nēé ka nuu i e ntádē kuení nto ne, ntada nto kuenta ntá'a ña, tsí ña ña kade ña nto kuenta.

⁸ Ntítō vii nto kuntōo nto. Koto nto tsi é ña vā'a sán ne, kanāa ntée nto vatā ó de ñaña, kiti kakachu'u ntāa é kaika ti kanantuku tī nee iña é kā'xí ti. ⁹ Ñá vii nto é ntio i, tsí kuinti'xe vā'a nto Xuva kō. Tsí ini nto tsí dadíi tsi ntánto'lo ta'an nto dá kaniñ ñūxiví sa. ¹⁰ Ntá tsi tē kúvi é ntō'lo kudii nto ne, Xuva ko tā'xi ña é kuinti'xe kue'en nto. Ta'xi ña é kūtíi nto é un ntí'í. Ta'xi ña é kūtū've vā'a nto nee iña e ntákuinti'xe nto, tsí ña ña e dóo vā'a ña. E kána ña kō é ní'i ko é vā'á nta'a Cristú ne, ntavá'a ña nto. ¹¹ Ká'an o tsi

dóo va'á ña, tsí kuvi víí ña é un nti'i ntii dañu ntūvi. Kuan tsi koo na kōo.

¹² Nta'a ení ko Silvanu, ña e dóo de ntaa, kuíni ko, de vá'a ú tutú sa'a vata koo é tā'xi kudií u nto itsi, vata koo é ka'án u ni ntō tsi sá'á é nuu é ntaa i ña é vā'a e tá'xi Xuva ko kō. Itsi sá'á tsi kuntikin nto.

¹³ Ña ntákuinti'xe i, ñá ntoo ñuú Babiloniá ne, taxnūu ña ntiusi nto. Dadii tsi nakaxnúu Xuva ko ña ni ntō. I'xá ko Marcú ne, taxnūu na ntiusi ntó di. ¹⁴ Nanume nto ta'an nto é kuinima tá'an nto é nuu é ntaa i.

Vā'a vá'a tsi koo kuntōo nto, un nti'i kue'en dú'va nto, tsi ntáduku ntée nto Cristu.

Tū'ún xuva kō vatā ó ntáka'an ña ñuú Coatzospan
 New Testament in Mixtec, Coatzospan (MX:miz:Mixtec, Coatzospan)
 copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
